

|         |       |       |         |
|---------|-------|-------|---------|
| धरती    | सीस   | रूप   | न्यारा  |
| बैर-भाव | बिंद  | पालना | प्यारा  |
| रुट्टी  | टल्ला | थोड़  | नित-नित |



धरती-मां तूं सब दी मां,  
तेरे अगें सीस झुकांऽ।

रूप तेरा ऐ बड़ा न्यारा,  
लगदा ऐ सभनें गी प्यारा।  
बैर-भाव दा बिंद निं नांऽ॥  
धरती-मां तूं सब दी मां॥

हिन्दू, मुस्लिम, सिक्ख, ईसाई,  
पालें मां तूं छाती लाई।  
फर्क नेई तूं करें दनां ॥  
धरती-मां तूं सब दी मां ॥

दिंदी फल, फुल्ल, रुट्टी, टल्ला,  
थोड़ निं कोई कुसै बी गल्ला।  
गुण तेरे में नित-नित गां ॥  
धरती-मां तूं सब दी मां ॥

रूप तेरा कुतै उच्चे फाड़ें,  
हिरण दौड़दे जंगल-जाड़ें।  
गा दे तोते, चिड़ियां, कां ॥  
धरती-मां तूं सब दी मां ॥

### अभ्यास

1. हेठ दित्ते दे सुआलें दे जवाब लिखो :-
  - (क) धरती गी मां की गलाया गेदा ऐ?
  - (ख) जंगलें-जाड़ें च रौहने आहले कु'नें पं'जें जानवरें दे नांऽ लिखो।
  - (ग) कु'नें पं'जें पक्खरुएं दे नांऽ लिखो।

उद्देश्य : पाठै दा चेता दर्हाना ते सामान्य ज्ञान दा विकास

2. खाल्ली थाहर भरु :-

- (क) हिन्दू मुस्लिम सिक्ख ईसाई  
पालें मां तूं .....।
- (ख) दिंदी फल, फुल्ल, रुट्टी, टल्ला  
थोड़ निं कोई कुसै .....।
- (ग) रूप तेरा कुतै उच्चे फ्हाड़ें,  
हिरण दौड़दे .....।
- (घ) गा दे तोते, चिड़ियां, कां  
धरती-मां .....।

उद्देश्य : स्मरण-शक्ति दा विकास

3. पढ़ो, समझो ते लिखो :-

|       |       |        |       |
|-------|-------|--------|-------|
| सीस   | भाव   | झुकांऽ | नांऽ  |
| ..... | ..... | .....  | ..... |
| छाती  | टल्ला | रुट्टी |       |
| ..... | ..... | .....  |       |

उद्देश्य : पढ़ने, उच्चरने ते लिखने दा अभ्यास

4. स्हेई दे अगें (✓) ते गलत दे अगें (X) दा नशान लाओ:-

- (क) धरती सारें दी मां ऐ। ☐
- (ख) धरती सारें नै भेद-भाव करदी ऐ। ☐
- (ग) धरती पर सिर्फ माहनू गै रौंहदे न। ☐
- (घ) जंगल-जाड़ें च हिरण दौड़दे न। ☐

उद्देश्य : विचार-शक्ति दा विकास

5. इस कविता चा स्त्रीलिंग शब्द चुनियै लिखो :-

उदाहरण :- धरती मां

.....

उद्देश्य : व्याकरणिक ज्ञान दा विकास

6. धरती-मां कन्नै सरबन्धत कोई होर कविता अपने अध्यापक कोला पुच्छियै चेतै करो।

उद्देश्य : (i) विशे-भाव दे बोध दा विकास

(ii) कविता गी लैऽ च पढ़ने दा अभ्यास

### अध्यापकें आस्तै निर्देश

इस पाठ च सीस, हिरण, कां, फल, फुल्ल, टल्ला, फ़ाड़, जंगल, रूप, बैर, नांऽ, धरती, मां, चिड़ियां बगैरा संज्ञां बरतोई दियां न। अध्यापकें गी चाहिदा ऐ जे ओह विद्यार्थियें गी संज्ञा-शब्दें दी जानकारी करान ते कन्नै होर उदाहरण देइयै उं'दी जानकारी गी पक्का करने दा अभ्यास करान।